

Goj Mboqhanq

Gij gingjsaek seiqhenz Mboq-hanq gyaendei raixcaix, raemxmbog sawdikdik. Youq gizde riuz miz aen gojgaeq doengh vunz he.

Seizgonq, Mbanjdazan henz singz miz boux yahmaiq ndeu, gvan de singq Yangz caemhcaiq de hix laux lo, baenzneix caezgya couh heuh de guh Yangz Meh’ auj. De mbouj miz lwg, boux dog gag youq, baengh dozfaiq gvaq ngoenz, saedceij gvaq ndaej gig haemzhøj.

Ngoenz ndeu, de bae ndaw singz cawx faiqyungz maranz, byaij gvaq aen gemh he, fwt raen gyang byozrum miz song aen gyaeqhanq hung. De couh siujsim yupyup gip hwnjdaeu, cuengq roengz faiqyungz gyang lamz bae. Ma daengz ranz le, de dawz gyaeqhanq yawj bae yawj dauq, yied yawj yied raen dwggyaez. De ngeix, danghnaeuz song aen gyaeq neix faeg ndaej ok hanqlwg daeu, ndaej caeuq bonjfaenh caeux haemh doxbuenx gig ndei ha. Cingqngamj duz gaeqmeh ranz de cingq faeg gyaeq, de couh dawz song aen gyaeqhanq neix cuengq haeu ndaw rongzgaeq bae, hawj mehgaeq bang faeg.

Gvaq 18 ngoenz le, gaeqlwg laebdaeb dotbyak okdaeu lo. Hoeng gyaeqhanq lij dinghdingh youq gyang rongzgaeq, mbouj miz maz doengh-danh. Yangz Meh’ auj naemj, laemx-

seiz byuk gyaeqhanq na lai, seizneix caengz daengz seizhaeuh ba. De dawz faiqyungz bau song aen gyaeq neix hwnjdaeu, gyangngoenz dozfaiq cuengq youq ndaw rungj, gyanghaemh ninz le couh cuengq haeu ndaw denz bae. Muengh le ngoenz dem ngoenz, daengz 49 ngoenz le, hanqlwg cungj-suenq ndaej faeg okdaeu lo. De sim-angq dangqmaz, umj hwnj hanqlwg cup bae cup dauq. Doeklaeng mbouj-lwnh hwnz ngoenz de cungj haeujsim ganq ciengx song duz hanqlwg. Hanqlwg lumj roxsoq nei, moix ngoenz cungj cienqlieh youq henz ndang de heuhvetvet, mbouj nyienh lizhai de. Hanqlwg ngoenz beij ngoenz maj-hung, bwnnyungz henjnomj menh-menh bienqbaenz bwn hausak. Lau hanqhau cungj youq ndaw ranz mbwq lai, Yangz Meh’ auj moix ngoenz mbwnmomj couh daiq hanqhau bae daengz aen mboq iq laeng mbanj youz raemx guh’ angq.

Ngoenz he banhaemh, sawqmwh mbwn ndaem deih raemh, rumzhaenq bongjifofo, ciepdwk couh doek fwnraq lo. Yangz Meh’ auj seiqlengq bae ra hanqhau, lij sing hung heuh: “Hanq ha hanq, sou youq gyawz ha?” Daengx mbanj cungj ra caez lo, vanzlij ra mbouj raen.

De bae daengz henz mboq baez yawj, doq doeksat yat lo. Aen mboq

iq gaxgonq seizneix gaenq bienq-baenz le aen raengz laeg, miz ciengh lai gvangq, cij raen ndaw raengz raemxlangh fanfoedfoed. De geizheih muengh dwk ndaw raengz, gag naemj: Gangj mbouj dingh song duz hanq gou couh ndoj haeu ndaw raemx bae luba! Baenzneix de couh hemq naeuz: “Hanq ha hanq, maranz lo.” Ngamq gangj sat, couh miz doiq hanq he daj gyang raemx ndonj okdaeu lo, songde youz daengz henz hamq, bin hwnjdaeu ai youq henz ndang Yangz Meh’ auj. De aeu vengqbuh mad hawq gij raemx gwnz ndang duzhanq, doeklaeng song fwngz got dwk duzhanq, naeuz: “Lwg ha, sou majhung lo, rox gag ra dieg guh ranz lo, baenzneix couh mbouj yungh caiq riengz gou bae ranz gou lo. Hawj gou daet dinj bwnrieng sou ba, ngoenzlaeng ndei doxnyinh.” Hanqhau bek fwed saenq rieng, ngaek-gyaey doengzeiq. De daet ndei le, hanqhau couh diuq roengz gyang raemx bae, yaephe couh mbouj raen lo.

Daj ngoenzhaenx hwnj, Yangz Meh’ auj niemh song duz hanq niemh ndaej baenzbingh bae, mbouj geij nanz couh gvaqseiq lo. Ranznden gekleiz de mwngz ok ngaenz gou ok haeux, baenzneix bang de guh saehlaeng. Ngoenz oksang, gyoengqvunz siengj ram gouhbenj de bae henz

mboq haem, ngamq ram daengz buenq loh, sawqmwh fwjbumz gyuemluemz, rumzhaenq gienjloed, fwnraq bik ndaej vunz cengq mbouj hai da. Gouhbenj yied ram yied naek, sawqmwh, “bada” sing ndeu, diuz faex ram gouhbenj goenq lo, gyoengqvunz couh baema ndoj fwn gonq.

Gvaq yaep he, rumz dingz lo, fwn sanq lo, duzdoengz venj youq gwnz mbwn, ndeiyawj raixcaix. Gouhbenj Yangz Meh’ auj mbouj raen lo, gyoengqvunz menh ngeix, aiq dwg duzhanq daeu coux aeu de bae lo. Baenzneix Gyoengqvunz couh haem gouh haizva Yangz Meh’ auj, hwnq guh aen moh de.

Daj seizde hwnj, aen mboq laeng Mbanjdazan couh miz raemx mbouj sat lo, ndaej hawj cien moux naz dwkraemx, gij saedceij vunzmbanj gvaq ndaej vannupnup. Aenvih song duz hanq haenx, baenzneix gyoengq vunz mbanj couh heuh aen mboq neix guh “Mboqhanq”, gaij aen cohmbanj baenz “Mbanjmboqhanq”, aen gemh Yangz Meh’ auj gip ndaej gyaeqhanq haenx heuhguh “Gemhhanq”, vih le gyo’ mbaiq Yangz Meh’ auj, lij youq henz mboq laeb bei cauh miuh dem, seizneix daengz ngoenzciet cungj miz vunz bae diemj yieng coemh ceiicienz hawj Yangz Meh’ auj.

(Ouh Caijfangh hoiz)

•Sawcuenhrael Lwgnyez•

Gij Golwgnyez Henz Dahhoengz

□ Lanz Haijyangz Moz Beibei / 蓝海洋 莫蓓蓓

Roen rinbanj deng ndit dak ndaej gig ndat, lohndin byaij youq gwnz de, angjindin deng log ndaej gig in, gou yamq buet yamq diuq gvaq duenh roen rinbanj baihnaj bakdou ranz, cingq yaek diuq hwnj giemxdou seiz, sawqmwh ngeix hwnj oengjindin deng raemx cimq le youh biegyouh nyaeuq, daxmeh yawjraen le gou haengjdingh deng ndaq! Ndigah gip-muengz cienq ndang youq henz roen aeu naez dwk uet oengjindin caeuq gahengh ndaej uqveve, lumj mbouj roengz raemx gvaq nei, doeklaeng cij sam yamq baen guh song diuq buet haeu bakdou bae.

Daihngaih Daxdaiq

“Ah Byauh! Mwngz buet bae gyawz gaeb majgvaij (Vahgun baihnanz gij coh duzgoep caeuq gungqsou, duzgoep heuhguh majgvaij naengheu, gungqsou heuhguh majgvaij naengraiz) gwnz bya lo?”

Daxdaiq naengh youq ndaw ding eijgvaengz cit iendoengzraemx, yawj-raen gou ret haeujdaeu, fwngz ndeu gaem doengzien, fwngz ndeu dawz ceijdwkfeiz, haep da yawj gou, sing daemq cam.

Gou rox, gwnzbiengz boux ceiq gyaey gou couhdwg daxdaiq gou lo.


Bi’ gvaq, daxmeh soengq gou caeuq dahnuengx daj Yangghangj daengz ranz

daiq, mizseiz cij gvaqdaeu yawjyawj dou. Daxdaiq couh bienqbaenz boux caeuq dou ceiq doxgyaez lo.

Daxdaiq mbouj rox saw. Nienzco de cawx le fag hanz moq, miz bouxlaisaeh aeu raemxmaeg youq gwnz sij “ciq le rox boiz, caiq ciq couh vei” geij cih neix, daxdaiq yawj le najhoengz, mbouj gamj yungh, bingzseiz lij dawz fag hanz gaeuq “sam cik sam”. Cawx ndaej daehndaij moq, ndoengj moq, couh ra gou guh geiqhauh, daengq cijaeu veh miz aen gien ndeu roxnaeuz aen ronghndwen goz-gemgem couh baenz lo.

Daxdaiq cix rox ciengq golwgnyez, baez ciengq cungj hawj caezgya roxnyinh angqyangz, ciengqngwngngwng lumj roix makmbei nei, mbouj caenh mbouj sat, hawj vunz dawzyinx. Gyanghaemh miz ronghndwen (Vahgun baihnanz heuh ronghndwen guh “dahndwen”), daiq couh rox son dou ciengq: Lwgsai, mehbwk; gouz hwnj byoem, gouz maj heuj; byoem miz faghanz raez, heuj miz xx hung…… Giz hoengq couh aeu gag ngeix lo, miz-mbangj naeuz heuj miz sienggonh hung, mizmbangj naeuz heuj miz faj dou hung, bouxgangj bouxdingq cungj riuhaha, sim-angq raixcaix.

(caengz sat)



Raemxdiuqdat Cingsih. Dozswh

Doq Byaij Doq Daengx

□ Vangz Sihging / 黄诗敬

Moksien hausaksak heux gvaq buenq bya Roxsingj bingz daemz ciuhvunz gig ndei

Daengngoenz raeujrubrub angqyangz rim loz Hoengheiq singjsien vuenyungz roenx ndij

Ngamnga fat raixcaix mbawfaex mwncupcup Doegsaw miz yungh vehveh baenzcaiz

Fwn fwngz gaem fwngz gvaq dah Duzbya gag rox youz haeu daehndaij

Doxbang doxcoengh doxgyaez Cingzngaih naekna sim van lumj dang